

東

華

錄

東華錄

臣周潤
論 舊恭校

秋七月己亥朔安塘筆帖式報海賊攻陷海澄長泰二縣署前鋒統領希佛陣亡副都統穆赫林提督段應舉俱自縊上諭海澄長泰既陷賊必猖獗閩省大兵無幾宜就近調發以資剿禦將軍華善所畱江南京口漢軍兵四百人及京口將軍王之鼎所屬漢軍兵六百人令副都統馬思文率之馳赴福建聽大將軍康親王調遣京口地方亦關重要宜發京師漢軍兵一千令副都統關保率往協守至日聽將軍王之鼎統轄又諭康親王傑書等官兵失援海澄恐因之自沮將軍大臣當時加鼓勵果能滅賊恢疆則前罪自釋仍予議敘其通行曉諭尋傑書奏海澄糧盡六月初十日

官兵委城突出海澄遂陷將軍賴塔喇哈達等所統官兵甚眾卒不能解海澄之圍致虧損將士宜卽從重擬罪但見在禦賊俟軍務稍暇另行察議臣旣身任調遣之責罪亦難逭得旨海澄何以不能救援其令將軍賴塔等明白具奏康親王俟事平日察議至於海澄突出官兵久被圍困勞瘁已甚該督撫其支取正項錢糧辦馬匹鎧仗給之○先是前鋒統領薩克察巴圖魯請援兵擊退永興之賊將軍穆占謂永興軍事已付大將軍簡親王凡事宜請於王簡親王喇布以聞得旨防守江西全省及湖南茶陵永興諸處凡有敕旨皆署穆占名於前簡親王名於後蓋倚穆占實甚初未分別汛守也今穆占因永興兩次失利輒思巧脫檄稱永興爲簡親王之地於往者屢次詔旨殊屬違戾穆占簡親王自今以往毋得互分彼此所有閒地汛兵悉行撤回無論郴州永興遇逆賊

來犯卽大振兵力以期盪滅○庚子諭宗人府貝子傅喇塔係宗
室懿親爲國宣力躬履行間勦禦賊寇撫綏兵民平定地方勦猷
茂著積勞薨逝深爲可憫理應優卹以示朕酬庸之意不拘定例
著封其子傅善仍爲固山貝子次子福存爲鎮國公○諭奉命大
將軍康親王傑書近聞海澄被陷大臣提督俱各自盡殊爲憫惻
前以初至兵力卽當削平山海諸寇因爾等輕視賊眾止知休養
士卒有失遠謀以至於此今勢不可緩緩則賊可據守地方積蓄
糧草固其深壘所關非細或有匪類乘此蠢動亦未可定王其悉
心籌度謀出萬全速滅賊氛慰朕懸切行間諸事王應統爲陳奏
特此密諭○諭征南將軍都統穆占爾等近來行兵致有大臣陣
亡聞之不勝傷悼兼之兩將軍彼此推諉以非己汎爲辭恐於事
機有誤深爲憂之爾等爭執雖屬細事但爾前此欲將簡親王兵

與爾相繼前進止畱將軍額駙華善副都統希福鎮守陳請前來
朕未允之蓋以江西地方所關甚鉅且無接續之兵此將軍等所
悉知爾將軍而權萬全務令江西不生事變屢有諭旨何至尙塵
朕懷今簡親王畱鎮在彼尙有此事爾復藉口非己汎地儻如所
請遣簡親王繼爾進兵今此賊眾又將何兵禦之滿兵之勢貴聚
聚則處處攻戰始克有濟若無用空城使滿兵分駐以寡力而遇
賊輕戰有志氣者盡沒行陣無賴之徒俱行敗北如此則實爲可
慮滿兵關繫極爲重大利戰則戰利守則守宜合全力以破賊眾
若徒分守恢復之空城似乎不可今福建廣東情形亦不甚妥爾
等當同心協力保固地方特此密諭○辛丑撫蠻滅寇將軍廣西
巡撫傅宏烈奏吳逆調各路賊兵數萬渡河與我兵對壘六月初
十日我兵失利退守鬱林屢請援師竟無應者今惟望臣舊標惠

潮兵至合力齊舉庶可成功得旨鬱林關繫最重將軍莽依圖額楚總督金光祖速遣官兵馳往應援儻賊勢盛我兵難以拒守將軍傳宏烈都統勒貝等應退至要害之地會同莽依圖等協力守禦都統馬九玉行已兩月逗遛不進甚屬不合宜檄令速赴梧州平南王尙之信總督金光祖速備夫船以濟傳宏烈舊標惠潮官兵毋誤前進○甲辰諭議政王大臣等據福建所報海賊劉國軒等攻取同安水陸犯泉州前大將軍簡親王奏永興諸處賊勢稍退已敕將軍穆占撤閒地之兵鎮防險要而大將軍安親王所遣援師已抵攸縣岳州大兵復水陸齊舉賊欲深入能不懼歸路阻絕耶向以永興緊急江右可虞因令署副都統岳爾多率師赴江西今閩中事迫岳爾多仍率師赴福建並移文江浙督撫將軍等速各撥馬千匹給岳爾多兵俾兼程馳往副都統馬思文自京率

往漢軍兵四百名亦與岳爾多同行移文大將軍康親王備夫船於浦城迎取大兵勿致有誤將軍王之鼎標兵六百名不必率往福建可仍畱京口見今所發漢軍兵一千令副都統關保率赴江西南昌俟陝西所遣兵至江西視何處當用卽協力從事並移會將軍穆占大將軍簡親王知悉○戊申以宋德宜爲刑部尙書由左都御史遷○安遠靖寇大將軍貝勒尙善奏我兵旣水陸攻岳請敕順承郡王量畱鎮兵於彝陵荊州諸處速撥每佐領兵各五名綠旗兵五千名馳赴岳州軍前得旨擊破逆賊規定湖南在此一舉今逆賊大勢偏注於廣西鬱林湖廣郴州永興諸處順承郡王等其勿以彼此異視務裨國事酌量畱兵以守荊州彝陵諸處餘兵悉發岳州○議政王大臣議覆奉命大將軍康親王傑書密奏討逆將軍劉進忠總兵官劉炎見在臣軍但伊等獲罪殊重深自疑懼

今值調兵前進而山海醜類蜂起恐伊等中懷叵測殆不可定請
旨定奪查將軍劉進忠總兵官劉炎久歷海疆於逆賊情偽地方
形勢在所熟悉應移文大將軍康親王令彼等馳驛來京臣等詳
詢明白再議具題從之○予江西陣亡遊擊趙璟官廕○乙卯工
部議覆河道總督靳輔奏臣前奏高家堰石工高有七尺其土隄
應加高三尺今石工再加三尺與土隄平然後另加土隄三尺再
高家堰高良澗一帶因水沒隄根隄身單薄必須加築戩隄一道
方爲萬全從之○工部議覆河道總督靳輔奏臣前奏黃河兩岸
將挑河之土分築遙縷格隄今勘有舊遙隄貼近河身擬以舊隄
爲縷隄於舊隄之外另築遙隄又前奏挑土築隄須十夫工程者
今因逐層夯杵非易擬用夫十五六名又前奏用驢運土今因各
夫不諳喂養議用車運又前奏離隄二十丈內不許取土今因宿

遷桃源等縣人力弱而工程多改令二十丈以外隨便取土又前奏河之兩旁各挑引河一道今因工費浩繁除清河北岸等處必須挑挖者仍相機挑挖外其餘俱用鐵埽帚濬深河底又前奏造漕河船二百九十六隻因不敷用今議添造三百餘隻從之○征南將軍都統穆占奏臣屢啓大將軍簡親王請令和碩額駙華善等援永興迄今未遣華善等既未嘗往破浮橋又不赴永興宣調來代臣守郴州俾臣往取耒陽或擊來犯之賊其在永興諸臣於賊來攻城時竟不拒截坐令三面受圍且永興所有滿兵每佐領八名有餘綠旗復及三千未嘗一戰應請處分得旨前授和碩額駙華善爲將軍署副都統多諾爲參贊敕令遣往永興何以至今不遣其於急要軍務貽誤非淺賊寇情形本令不時報聞比來並無所報殊屬不合簡親王俱明白回奏華善可否應往郴州穆占

可否來永興簡親王與穆占詳議至於永興兵力不爲不足護軍統領喇賽等不行退賊之故簡親王嚴密以聞○丁巳轉張士甄

爲吏部左侍郎以劉捷爲吏部右侍郎

由左副都御史遷

○撫蠻滅寇

軍廣西巡撫傅宏烈等自容縣退駐藤縣奏言廣西事不可問梧州亦復可虞請遣大臣一員令觀臣營進止並請馬九玉與臣合營效力得旨廣西軍務已委任將軍莽依圖額楚傅宏烈都統勒貝副都統額赫納等自宜殫心籌畫和衷協謀期濟大事不必更遣大臣莽依圖等務相度機宜可進則進否則暫守要地整飭軍馬待時而動其馬九玉原令將軍等隨宜調遣不必合營○戊午福建總督姚啓聖奏設兵捍守本期有裨實用鎮將各官多以食餉兵丁充伴當書記軍牢等役至臨陣十不得七臣標亦有軍牢等役俱經全革另募入伍以足兵額 上諭兵部總督姚啓聖革

退伊標軍牢等役另募入伍有裨勦禦可嘉直隸各省綠旗兵丁經制額數專爲防守汛地征勦賊寇而設該管各官自宜實足兵數以資戰守督撫提鎮等經制兵內如有充件當書記軍牢以及馬夫水夫等役悉行裁汰務足兵額儻仍不改陋習因循踵行該督等糾劾從重治罪若督撫徇庇不糾或爲科道指參或被旁人首發治以徇庇之罪決不輕貸其通行曉諭○奉命大將軍康親王傑書奏副都統雅塔理棄同安退入泉州賊遂直前圍泉州副都統紀爾他布提督石調聲退至興化惠安復陷臣隨檄將軍賴塔總督姚啓聖守漳州調將軍喇哈達速率兵來援泉州得旨海逆日以猖獗同安惠安相繼失陷泉州見被賊圍速宜調兵救援可檄趣署副都統岳爾多疾馳以往平南王尙之信所遣副都統尙之璋廣東提督侯襲爵等抵潮州日同總兵官馬三奇固守潮

州著靖南王耿精忠侍郎達都等自潮州率官兵馳赴福建與喇哈達等協力剿除海逆以解泉州之圍既而傑書復奏閩省地方失陷所在道路梗塞更屬堪虞惟望署副都統岳爾多統兵來至上諭兵部岳爾多自出征以來初無寸效今令率兵往援泉州復不倍道疾馳稽延時日殊屬不合著嚴催速進○己未先是

上諭詹事宜昌阿曰我水陸大兵並進攻岳州今或宜戰克或宜困取何時何日可以恢復其確探明白速行奏聞至是宜昌阿奏今水陸圍岳州而九貴山至今未獲駐兵故賊得往來此地以通樵採如岳州不下長沙無船可用而荊州大兵亦不能渡江宜固守長沙荊州調餘兵以困岳州俾內外不通斷其樵採賊勢困窮則十日內外似可克復然軍機朝夕有變今賊勢窮蹙眾心惶懼如有機可乘卽旦暮克取亦不可定得旨岳州爲湖南咽喉要

地必此處恢復則長沙荊州之兵始能前進大將軍順承郡王所部兵數不少攻取岳州事關最要宜如大將軍貝勒尙善前奏所請速遣滿漢兵馳赴岳州其陝西往江西之兵可勿往江西遣赴岳州將至岳州時如永興圍解卽畱此兵於岳州同順承郡王所遣兵併力進攻岳州儻永興之圍未解則令此兵由岳州赴大將軍簡親王軍前河南安慶俱近岳州河南巡撫董國興可遣標兵一千五百人安檄巡撫徐國相遣標兵五百人令賢能官總領俱赴岳州將軍阿密達抵南昌釋甘度海等亦率之赴簡親王軍原護軍四十人俱令同往岳州此諸路兵抵岳州貝勒尙善量增其軍所有水陸官兵於九貴山設立一營但有可克之機卽進兵攻取○征南將軍都統穆占奏逆賊三面圍永興水陸道阻臣因復酌遣護軍甲兵綠旗兵及火礮令副都統布舒庫率之往會署副

都統尼雅漢堅壁河南岸永興內外一切軍機令與喇囊薩克察巴圖魯合謀而動但郴州諸處廣遠遼闊鎮守乏兵請遣江西贛州總兵官哲爾肯並其標下官兵速赴臣軍得旨平定湖南剿除逆賊俱委任將軍穆占大將軍簡親王等穆占宜親赴永興撲滅賊眾頃者都統王國棟率兵往鎮宜章宜章與郴州相近總兵官哲爾肯不必赴穆占軍前也○撫密滅寇將軍廣西巡撫傅宏烈奏僞總兵何興久踞桂東桂陽上猶崇義江楚交界地方臣遣隨征知縣王世諾招諭隨率兵丁一萬餘投誠下部議敘○庚申予故刑部尙書姚文然祭葬諡端恪○吏部題各省題薦人員原令其作速起程今陝西李容王宏撰江南汪琬張九徵周慶曾彭桂潘耒嵇宗孟張新標吳元龍蔡方炳直隸杜越范必英浙江應搗謙山西范鄯鼎江西魏禧並以疾辭陝西李因篤以母老辭相應

咨催赴京得旨李因篤等既經諸臣以學問淵通文藻瑰麗薦舉該督撫作速起送來京以副朕求賢至意○先是平南王尙之信奏臣弟尙之孝向蒙授平南大將軍之職藩下鎮將曾經統領今與臣共居一城體統難施每每引嫌心不自安請調尙之孝赴京師別用 上允其來京至日給一品頂帶食正一品俸已而尙之孝奏臣詣闕請罪分當誅戮過蒙寬宥臣願募兵三千赴王及將軍軍前勦賊報效得旨尙之孝既請募兵效力以報國恩可授宣義將軍暫駐江西南昌聽募兵三千俟兵數募足軍械完備赴大將軍簡親王軍前征勦迎賊○安遠靖寇大將軍貝勒尙善奏舟師敗賊於岳陽湖僞將軍杜輝等乘船犯柳林背我師迎敵君山扁山舟師亦來合擊賊敗走斬獲甚多沈其賊船方進戰時夸蘭大薩爾海鈎杜輝船賊擲火薩爾海之船被毀署護軍統領查喇

克圖以舟助戰救薩爾海及兵百餘人並奪賊船而還 上諭

護軍統領查喇克圖助戰奪賊船可嘉事平議敘嗣後我舟進與

賊戰有鄰近舟艦能助奪賊船者記名待敘其移知貝勒尙善俾

通行傳諭○壬戌 上詣鞏華城○以魏象樞爲左都御史

由戶部左○甲子 上回宮○遣兵部侍郎郭丕員外郎舒恕赴湖南

按問軍中事宜諭之曰將軍穆占屢奏言大將軍簡親王援師不

應機遣發致事不克濟簡親王何故不遣官兵其穆占前報逆賊

全力偏注郴州果會偪犯郴州否如未嘗來犯則郴州永興之間

相距甚近穆占何故不勦滅永興逆賊以至若是此等事由可明

確察訪至地方形勢永興前後兩戰及逆賊侵犯情形一併察明

嚴取供詞以奏今羣賊肆犯永興其郴州宜別委大臣量留官兵

鎮守穆占身率大兵前赴永興爾等至彼或應調穆占前赴永興

或應仍畱郴州其與穆占簡親王詳確定議一面進發一面奏聞
復令傳諭穆占曰穆占不量地方緩急不遣重兵鎮守致賊犯永
興及請濟師又不迅速精銳官兵併力而往我朝諸將遇敵雖兵
力單弱亦不退縮必奮勇攻擊是以都統宜理布護軍統領哈克
山等陷歿於陣夫爲將者當以朝廷大事爲念徒爲身計獨畱精
兵自護軍機坐失職此之由况穆占陛辭時曾面諭凡有分遣必
厚兵力頃永興兩次失利朕心深爲縈慮蓋緣穆占不厚兵力不
調發精銳之所致耳如近者大兵圍困長沙岳州豈不可使併力
平濠拔杞肉薄而攻破毀其城但朕心憫惻不忍官兵慘罹鋒鏑
故令大隊舟師並進其諭穆占知之○戊辰安遠靖寇大將軍貝
勒尙善奏吳逆於水陸要路在處固守套河峽係洞庭湖要口我
兵進剿門戶賊設樁木攔阻兵船總兵官萬正色兩次進兵砍倒

椿木從此舟師直進逆賊旦夕可平下部議敘又奏討逆將軍都統鄂內敗賊杜巴姜等於柳林背殺賊千餘名下部議敘

八月己巳朔以朱裴爲左副都御史

由太常寺卿遷

○以葉映楠爲陝西

按察使

由郎中遷

○庚午奉命大將軍康親王傑書等奏海澄公黃芳

泰年少柔懦不勝兵事得旨海澄公黃芳泰功臣之嗣既年少不能軍而仍授以兵儻至失律恐反爲彼罪且於地方無益可令黃芳泰及黃芳世之子並其家屬俱赴京師務安置得所以副朕始終保全至意其標下官兵督撫等察其可用者補入各營罷老不堪者量行安插得所○諭兵部向因靖南王耿精忠還省城耿昭忠可攜鎮平將軍耿昭忠赴閩暫理旗務今耿精忠還省城耿昭忠可攜其祖父骸骨來京○靖逆將軍甘肅提督侯張勇奏臣與提督孫思克及理事官拉篤祜選擇通事密行遠探噶爾丹情形據回報

云有鄂齊爾圖汗屬下達爾漢哈什罕曾爲噶爾丹擄去今往西
海遇而問之彼言噶爾丹旣殺鄂濟爾圖汗今歲二月內令其屬
下兵丁殷實者各備馬十匹駝三隻羊十隻窘乏者馬五匹駝一
隻羊五隻自其地起兵不知何向臣向聞甘屬番人素與僧額輸
租僧額歿屬與噶爾丹臣召其頭目永柱等訊之言噶爾丹居西
北金山距嘉峪關兩月程卽古大宛國也臣聞噶爾丹遣喇嘛萬
春來召番人頭目至河套議事臣密遣人誘問之萬春言噶爾丹
鄰近諸番有從之者亦有從之而復去者噶爾丹尙有侵西海之
意因人心不一西海路遠恐一動而本地有事不敢輕舉臣復遣
人至墨爾根台吉所審視之眾皆寂然安居第番情難以豫料謹
疏奏聞得旨噶爾丹雖無起兵聲息應仍檄該將軍等不時偵探
加意防守邊境○西洋國王阿豐素遣陪臣本多白壘拉進表貢

獅子表文曰謹奏請 大清皇帝萬安前次所遣使臣瑪訥撒爾

達聶叨蒙 皇帝德意鴻恩同去之員俱沾柔遠之恩聞之不勝

懼忭時時感激隆眷仰巍巍大清國龍光因諭凡在西洋所屬永

懷尊敬大清國之心祝 萬壽無疆俾諸國永遠霑恩等日月之

無窮今特遣本多白壘拉齋獻獅子天主降生一千六百七十四

年三月十七日奏○甲戌轉于可託爲戶部左侍郎調田六善爲

戶部右侍郎

由工部調

○乙亥予故倉場侍郎嚴沆祭葬○戊寅上

幸南苑行圍○湖廣總督蔡毓榮奏逆賊窺伺糧艘復犯大營官

兵合力會剿屢敗之斬首千餘下部議敘○己卯安遠靖寇大將

軍貝勒尙善於四月初四日以疾薨於軍貝子章泰以聞 上命

貝勒察尼代爲安遠靖寇大將軍赴岳州統其軍○壬午 上還

宮○平南王尙之信奏高雷廉三府經臣恢復後令副都統金榜

選等駐防雷州府有海賊楊二等在沿海地方肆行搶掠金榜選等率官兵攻奪礮臺三戰三捷斬賊千餘大獲賊船礮火軍械下部議敘○癸未 上御經筵○福建總督姚啓聖奏平和失陷臣會商海澄公黃芳泰遣參將呂孝德等進剿大敗海寇復平和縣得旨嘉獎下部議敘○甲申 上復欲親征議政王大臣等諫止請敕大將軍察尼等詳籌方畧從之○乙酉裁長蘆運判所管事務歸青州分司兼理○丙戌福建提督楊捷奏福建水陸進兵勢不能兼顧得旨提督楊捷可專轄陸路兵水師提督別行補授當此海寇鴟張之會統轄水師非才畧優長諳練軍事之人不可總督姚啓聖提督楊捷巡撫吳興祚其遴選保奏楊捷又奏臣向在山東深悉山東河南兵熟習交槍鳥槍者甚多乞各發千人江南兵有熟習弓箭火礮者亦發千人赴閩得旨福建土著兵丁未諳

行陣雖經召募無裨實用若得久習營伍之士隨到即可成功總
河靳輔山東巡撫趙祥星其各發標下兵善交鳥槍者千人河南
巡撫董國興發河南兵善鳥槍者亦千人前赴福建所遺兵缺速
行募補○奉命大將軍康親王傑書奏請簡旗下老成歷練總兵
官調補潮鎮以代馬三奇其潮州鎮標見在委署各僞員宜速改
調至將軍劉進忠標員宜分布各標或發廣西將軍軍前效力又
如續順公沈瑞降賊受其侯爵結爲姻婭恐其鉤連起釁宜黜其
公爵所屬旗兵分隸督撫提鎮各標家口宜徙山西諸省得旨康
親王曾言馬三奇人甚精強行間懋著勞績因擢潮州總兵官且
潮州將士已發援泉州今無故妄有猜疑輒行改調使效力者且
至心寒續順公沈瑞及標下官兵素懷忠義緣眾寡不敵爲賊所
脅向者副都統張夢吉等言伊等身在行間請發家口入京朕以

道路遼遠不必遷徙來京令暫駐潮州已有成命所奏請黜沈瑞

公爵分其標兵徙其家口俱不准行○壬辰以董安國爲工部左

侍郎

原任鴻臚寺左侍郎

○癸巳廣東廣西總督金光祖奏祖逆敗竄廣西

收集餘黨勢必糾合大隊肆行侵擾况賊旣陷鬱林必乘勢犯高

州所關甚鉅亟宜豫籌得旨頃命將軍莽依圖等整頓軍械以俟

機會今旣不急進廣西如賊犯高州平南王尙之信將軍莽依圖

額楚傳宏烈總督金光祖等或增遣滿漢官兵赴高州協力剿賊

或遣兵攻北流鬱林以分賊勢俾不得侵高州其公同酌議務令

高州諸處勿有疏虞○甲午以出征江西湖廣陣亡及病故官兵

骸骨還京遣內大臣侍衛往奠之○乙未揚威大將軍簡親王喇

布奏吳三桂初病中風噎膈有犬登其案而坐因病甚口不能張

且下痢於本月十七日遂死賊黨閉衡州城門潛調僞將軍胡國

柱馬寶等於永興諸處取吳三桂孫於雲南越四日胡國柱等自永興至衡州始啓城門通行旅征南將軍穆占亦奏據護軍統領喇賽前鋒統領薩克察巴圖魯報賊自本月初二以至二十日屢偪永興滿漢官兵晝夜堅守屢退賊眾二十一日賊焚營遁上諭議政王大臣等覽大將軍簡親王等奏逆賊吳三桂已死渠魁既殞賊必內變諸路將軍宜乘時各統大兵分路進剿克復疆圉永興賊既遁去簡親王宜由茶陵赴安仁進偪衡州其永興官兵勞苦已久可駐茶陵諸處暫息自陝西調來副都統夸代所領每佐領兵二人不必遣赴茶陵卽畱岳州軍前大將軍貝勒察尼等務水陸夾擊速取岳州○禮部議欽天監治理厯法南懷仁進康熙永年厯係接推湯若望所推厯法應交翰林院仍著該監官生肄習永遠遵行從之○丙申諭諸路王貝勒大將軍將軍督撫提

鎮等茲據大將軍簡親王等報吳三桂頃已身斃吳三桂數年以來構兵倡亂荼毒生靈罪大惡極故天命殛之當日許其遷移本欲保全安插始終眷寵不意其包藏禍心輒行反叛背累朝豢養之恩逞一旦鴟張之勢橫肆兇逆擾亂疆土元兇既伏天誅習從宜施寬典凡在賊中文武官員兵民人等皆朕赤子素受國家恩養必非甘心從逆或志存忠義不能自拔或勢被驅迫懷疑畏罪陷身逆黨朕甚愍焉其各體朕好生之心翻然悔悟爭先來歸朕必優加恩賚論功敘錄爾等卽宣布德意廣示招徠務使懷忠抱義之士順天命以圖全審事機而建績撫綏戡定早奏蕩平以副朕嘉興維新至意○是月免江南高郵州水災賦

九月己亥朔諭兵部向以江西可虞因調總漕帥顏保前往今南昌已爲內地其令帥顏保赴吉安鎮守○癸卯 上御弘德殿講

官陳廷敬等進講尙書啓乃心沃朕心四節 上曰朕觀高宗命

傳說諄諄以納誨輔德爲言可見自古君臣必一德一心至誠感
孚爲上者實心納聽以收明目達聰之益爲臣者實心獻替以盡
責難陳善之忠然後主德進於光大化理躋於隆平後世君臣之
間徒尙虛文中鮮實意治不逮古職此故耳陳廷敬等奏曰 聖
諭及此誠社稷萬年之福也○諭議政王大臣等將軍花善署副
都統多諾自六月訓遣永興乃迄今未至殊負厥職其集議以聞
尋議政王大臣等議奏花善多諾俱宜革職披甲令赴大將軍和
碩簡親王軍前效力得旨我國家將士凡遇調遣俱卽馳赴從無
若此遲延觀望者使花善等兵未事而至未必無功今已事畢至
將安用花善多諾宜如議處分但正值討賊之際免其革職披甲
俱委署夸蘭大發與將軍穆占令軍前效力○戊申 上奉 太

皇太后幸湯泉○予廣東殉難遊擊李成功官廕○己酉先是議政王大臣等議令大將軍安親王岳樂順承郡王勒爾錦貝勒察尼等將作何進兵之處詳議敷陳至是勒爾錦奏以守兵餘力並入行軍復多增槍手五路渡江齊力大舉庶可滅賊岳樂奏臣親赴岳州仍舊布置舟師調諸路大礮急攻陸營勢必克復察尼奏舟師入湖三月餘雖未大挫賊鋒賊亦不敢公然出戰近聞逆賊糧餉將絕將軍林興珠又獻策謂湖水涸後宜圍以木筏立木椿列火礮俾小船巡警可乘之機正在此時然湖水之涸爲期尙遲兩三月間賊中安知無變今乘水勢未退立一營於南靖港俟水涸酌撥舟師營於君山高家廟絕其糧道賊勢窮蹙不難撲滅又一議九貴山雖經立營而圍猶未弔若水涸則君山高家廟諸處俱涸賊於石首華容澧州常德陸路皆通君山高家廟不以大隊

立營則圍賊難徧風浪之中船不可泊徒致損壞若於舟師分撥立營萬無餘力 上覽三奏因諭兵部吳三桂已死諸逆潰亂之際宜急取岳州動支如許錢糧營治舟艦入湖三月餘況將軍林興珠獻策甚明俟湖水盡涸我船與賊船俱無所施彼時多掣舟師無不足用我之船艦兵卒頗屬有餘豈可推諉使大事中阻今宜於南靖港君山高家廟諸處俱立營壘斷賊糧道務須困取岳州至於君山高家廟諸處既需大隊應令副都統關保所率之兵毋往江西改赴岳州聽貝勒察尼調遣如舟師必難久頓湖中即以狀聞貝勒察尼等既圍取岳州安親王順承郡王所奏俱不必行○甲寅 車駕至湯泉率從官謁 孝陵○福建總督姚啓聖奏八月十五日官兵復漳平縣得旨嘉獎下部議敘○乙卯征南將軍都統穆占奏官兵敗賊於耒陽縣擒僞守備胡起龍等下部

議敘○丁巳奉命大將軍康親王傑書奏遣署副都統禪布等統兵進剿海賊兩路夾攻復惠安縣解泉州圍福建巡撫吳興祚奏官兵敗賊於白鷺嶺復永春德化等縣賊渠劉國軒等遁追敗之於赤灣諸處沈燒賊船六十餘艘殺賊兵六千餘級得旨嘉獎下部議敘○甲子 上還京師○先是將軍鄂內等奏賊乘船自岳州赴湘陰取糧米火藥副都統德業立提督周卜世等駐扁山不行擒獲俾賊逸出尋賊船由扁山入岳州伊等又不邀擊縱之入城 上諭以如許錢糧造成船艦調集諸路官兵水陸並進以圍岳州乃賊船衝出既不行阻禦竟致逸出及其入城以如許舟師何以不行邀擊任意縱入大將軍貝勒察尼其嚴察明白具奏至是察尼奏德業立周卜世等率一百三十船截剿茲賊賊僅二十餘船未能獲其一船畏縮怯懦縱賊入城議政王大臣等議德業

立周卜世等應革職充伍令軍前效力得旨德業立周卜世等本
宜如議處分但值勦賊之際可俱革職畱任效力贖罪鄂內總統
舟師身爲主將乃用庸懦之徒致誤大事事平之日從重議處○
丁卯先是鎮南將軍莽依圖奏進定廣西亟須厚集兵力見在綠
旗之兵有名無實臣思平南王尙之信練習戎行器械整備請調
赴梧州統轄官兵委以平粵之責與臣等協謀而行實於大事有
濟 上命尙之信會同將軍額楚總督金光祖巡撫金僞等定議
以問至是尙之信奏臣向以逆賊偏注永興恐都統王國棟不能
制敵擬於九月初旬親往策應頃聞吳三桂已死永興賊遁今湖
南勢如瓦解取之甚易臣當進定廣西 上諭乘此逆賊驚擾之
時大兵亟宜前進勦撫並用綏定疆圉授平南王尙之信爲奮武
大將軍統兵赴永興郴州諸處會合大將軍簡親王將軍穆占等

併力同心以圖進取將莽依圖額楚傳宏烈總督金光祖等各駐本汛相度機宜規定廣西應給尙之信敕印准滿洲大將軍王等例遣內閣官員齎往

冬十月己巳工部議覆安徽巡撫徐國相奏本年七月二十一日黃水泛漲將碭山縣石將軍廟蕭縣九里溝二處衝決查本年二月總河靳輔請銀二百五十餘萬兩大修河道動工已及九月未知所修工程何如今又衝決多處應請遣大臣前往查勘得旨著戶部尙書伊桑阿右侍郎田六善前往查勘○庚午 上幸湯泉○壬午福建總督姚啓聖奏遣子姚儀率領官兵敗海賊於同安縣擒斬僞副將林欽等五員復同安縣得旨嘉獎下部議敘○癸未 上巡視北邊○甲申改廣西梧州分巡道爲分守蒼梧道照舊兼理驛鹽事務○丙戌次三屯營率從官射○丁亥次灤河岸

閱三屯營軍資將士○福建總督姚啓聖奏海賊劉國軒犯泉州官兵擊卻之賊退據長泰臣會同將軍賴塔等率滿漢官兵進討九月十九日大敗賊於蜈蚣山破其七營斬僞總兵以下四千餘級復長泰得旨嘉獎下部議敘○辛卯 上還次湯泉○河道總督靳輔奏黃河自徐州而下南北兩岸隄並清河縣南岸自洋河以下兩岸各隄見在酌量儉修委官設兵防守當此伏秋大水幸皆保固無虞惟是徐州以下雖在大修而上流漫衝以致宿徐等州縣處處被災秋成失望臣擬建減水大壩一十三座則水不湧漲其原估隄工亦可量減且告成之後不特無奪河阻運之虞而沿隄田畝水災亦可永止下部議行靳輔又奏淮揚運河出口之處是爲清口離淮黃交會之處甚近黃漲卽灌進運河以致河底墊高歲須挑浚今臣往來相度必須將清口閉斷從文華寺挑新

河至七里閘以七里閘爲運口由武家墩爛泥淺轉入黃河如此則運口與黃淮交會之處隔遠運河不爲黃水所灌自無墊高之患矣下部議行○丁酉 世宗皇帝生 上之第十一子也 母曰吳雅氏

十一月己亥鎮東將軍喇哈達奏海賊斷江東橋等處阻截援兵泉州守制在籍翰林院侍讀學士李光地遣人至臣軍中爲大兵鄉導由漳平縣朝天嶺小路入安溪縣李光地復遣人修通險道接濟軍需又躬迎大兵文臣爲國盡勞請加議敘得旨李光地當閩地變亂之初不肯從逆具奏密陳機宜殫竭忠貞今又遣人迎接大兵指引道路平險隘治浮橋餽食物餉軍率兵民備辦糧米供給兵眾口糧矢志滅賊實心爲國深爲可嘉著從優升授爲學士○甯南靖寇大將軍順承郡王勒爾錦奏先後投誠偽官及房

縣來歸之僞總兵何以敬等雖授劄以示鼓舞而止食兵糧生計難給得旨何以敬等慕化來歸宜令得所以勵來者其悉予半俸

○辛丑 上還京師○予甯夏陣亡守備王標官廢○乙巳奮威將軍平涼提督王進寶奏臣子王用予蒙恩授副將職銜隨征效力又功加署都督同知父子同在秦中例應回避或准入侍禁旅或赴湖廣江西軍前自備戰馬力圖報效得旨陝西有事之時王進寶父子率領官兵勦殺賊寇保守地方著有勞績今秦省仍屬緊要王用予著畱伊父處同守地方○丙午 上幸湯泉○庚戌諭內閣學士噶爾圖屯秦曰遵化所屬有附近湯泉之婁子山袁格莊啓新莊石家莊梁家莊此五莊供辦徭役其一年地丁錢糧俱令蠲免如今歲已經徵收准於來歲蠲免至鮎魚關城內外居民七十一家免其一年正供外仍每戶賜銀二兩爾等從戶部支

取親閱分給所蠲錢糧令州官卽徧諭妻子山等莊及鮎魚關居民務使均霑實惠○先是諭議政王大臣等吳逆旣殞賊心震動宜遣吳三桂原屬人員前往招撫山東按察使何毓秀等十員內擇數人量加職銜給與敕書發大將軍安親王簡親王順承郡王貝勒察尼公圖海將軍穆占莽依圖軍前或徑令彼等親往招撫或聽其遣人先通音問然後身往招徠其公議發遣儻有濟於事仍量功大小從優議敘於是議政王等列何毓秀等名具奏上命加山東按察使何毓秀太常寺卿工部郎中張光岳太僕寺卿奉天府治中佟啓聖通政使司左通政安邱縣知縣胡瑞通政使司右參議行人司行人崔啓元鴻臚寺卿武鄉縣知縣齊漳通政使司左參議各齎敕諭往諸路大將軍軍前招撫陷賊官員兵民敕曰自逆賊吳三桂煽亂以來所在官兵多被誘惑故陷身賊中

莫能自拔朕已洞悉情形屢頒敕諭廣示招徠開其自新之路今
逆首吳三桂已伏天誅念在彼脅從文武官員兵民人等皆朕赤
子素受國家恩養必非甘心從逆或志存忠義遲回待時或勢被
驅迫無由歸化朕甚憫焉茲特命爾等齎敕往陝西大將軍長沙
大將軍岳州大將軍征南將軍楊威大將軍荊州大將軍等軍前
特行招撫爾等曩在滇黔素多親識易於開導必相信從須宣布
德音相機勸諭務令陷賊人員翻然悔悟爭先來歸有密謀內應
擒斬賊渠及率領兵民獻城納款者俱赦其前罪論功敘錄加恩
安插俾令得所煌煌諭旨朕不食言爾等奉茲委任務須殫心籌
畫勿失事機或親身徑前招撫或先遣人曉諭後乃親往俱同各
將軍等酌量而行若招撫成功量功大小從優議敘加恩爾等其
勉圖報效以副朕定亂安民至意○安遠靖寇大將軍貝勒察尼

奏十月二十二日僞將軍杜輝巴養元姜義乘二百五十艘犯陸石口將軍鄂內等率師分擊大敗之二十九日署副都統葉儲赫等復率師進擊岳州破賊眾萬餘斬首甚眾下部議敘○乙卯

上謁 孝陵○辛酉 上奉 太皇太后回宮○壬戌揚威大將軍簡親王喇布移師進取郴州○是月免江南宿壽霍邱等十入州縣及河南上蔡遂平廣東南海縣水災賦

十二月甲戌兵部尚書王熙丁父憂翰林院掌院學士陳廷敬丁母憂吏部奏聞 上諭大學士等滿大臣有喪特遣大臣往賜茶酒滿漢大臣俱係一體漢大臣有喪亦應遣大臣往賜著大學士明珠翰林院掌院學士喇沙里等攜茶酒往賜○奉命大將軍康親王傑書奏都統賴塔等率領滿漢官兵於十月二十七日敗賊於柯鏗山萬松關副都統紀爾他布總督姚啓聖提督楊捷等敗

賊劉國軒於江東橋又敗之於潮溝之間副都統胡圖敗賊吳淑

於石衛寨斬獲無算盡奪賊寨打沈賊船得旨嘉獎下部議敘○

乙亥以郭四海爲兵部尙書由左都御史遷○丙子調宋德宜爲兵部尙

書由刑部調○庚辰以金鉉爲兵部督捕右侍郎由左副都御史遷○辛巳頒

日講四書解義於滿漢文武大臣○予故原任禮部尙書王崇簡

祭葬諡文貞○壬午以劉健爲刑部尙書由吏部右侍郎遷○乙酉以葉

方藹爲翰林院掌院學士兼禮部侍郎由翰林院侍講學士遷○丁亥鎮南

將軍莽依圖奏十二月初三等日逆賊來犯將軍額楚傳宏烈率

兵接戰失利營壘俱陷藤縣失守見存兵力甚薄梧州勢危得旨

今梧州可虞大將軍平南王尙之信不必往湖南徑赴梧州與莽

依圖等商酌調遣官兵併力剿賊以靖地方如王斷不可離省卽

速選精兵馳赴又韶州南雄已爲內地將軍舒恕可率領每佐領

兵二人急赴梧州至將軍額楚傳宏烈等見在討賊俟事平旋師
日察議○庚寅先是僞將軍杜輝遣僞參將林甯等奉書請降安
遠靖寇大將軍貝勒察尼等慰諭約期遣回至是詹事宜昌阿奏
僞總兵陳華李超率文武官並兵丁等投誠據稱杜輝等事泄同
謀諸人俱被吳應麒殺死得旨陳華李超等感戴國恩與僞將軍
杜輝共約歸正事泄杜輝被殺陳華李超仍來投誠殊屬可嘉俱
授爲都督同知總兵官支全俸畱大將軍貝勒軍前俾招徠賊黨
所屬官弁按原品支俸家口隨彼等所欲安插得所○先是 上
命江西總督董衛國率兵往防銅鼓營至是董衛國奏銅鼓營地
方甯靖無事增防逆賊盤踞岳長臣願親領標兵五千更調江西
各營兵數千赴楚效力得旨董衛國以銅鼓營無虞願親率標兵
赴楚效力可嘉宜如所請統所屬官兵馳赴岳州多備火器挨牌

鹿角攜往擇賢能官留守江西酌調本省兵接續前進其標下官兵勿令分撥他處聽自統全部以行○詹事宜昌阿奏見今賊糧已絕僞屬官兵相繼歸誠搜獲逆賊往來文書俱係調諸路逆賊援兵之事今並賊書密咨兵部得旨逆賊食盡勢窮調取援兵大將軍貝勒等宜約會鎮守諸要路將軍大臣嚴緝奸細俾賊內外音問不通固我營壘以禦來援之賊務期克取岳州並檄趣江西總督董衛國速行馳赴○予福建殉難南安縣知縣宋煜官廕○辛卯調董安國爲吏部右侍郎由工部調○乙未撫遠大將軍都統大學士公圖海奏今秦省諸要隘守禦已固省城備有援師臣欲輕騎赴京面奏事宜得旨圖海攜大將軍敕印前來吳丹佩將軍印暫統大兵○是月免直隸任縣河陽汝陽江西甯州等十七州縣旱災江南海州湖廣興國二十州縣水災額賦○是歲朝鮮西洋

入貢○人丁戶口一千六百八十四萬五千七百三十五田地山
蕩畦地五百六萬四千七百九十二頃八十七畝徵銀二千一百
九十五萬三千五十四兩二錢有奇米豆麥六百二十萬九千三
百四十五石二斗有奇草二百二十四萬二千六百一十九束茶
十五萬五千三百六十五引行鹽三百九十三萬二千六百三十
引徵課銀二百三十九萬五千六百七十五兩八錢有奇鑄錢二
萬三千一百三十六萬五千三百六十有奇

東華錄

康熙二十三

臣王先謙敬編

臣周淪蕃恭校

康熙十八年己未春正月癸卯以楊雍建爲左副都御史

由太僕寺卿遷

○平南王尙之信奏康熙十七年十二月初三日瓊州水師副將

王珍奇率兵大破海逆楊二等於山墩下部議敘○乙巳發常平

粟賑山東災○湖廣提督桑峨奏招撫岳州僞遊擊劉鵬等文武

官七十五員下部議敘○戊申諭戶部山東河南二省被災民致

饑饉深軫朕懷若不亟行賑救則百姓恐致流離侍郎察庫前往

河南省侍郎薩穆哈前往山東省會同該巡撫等確查被災輕重

之處無論正項錢糧或漕糧或一應雜項錢糧酌動賑給饑民務

使得所勿致流離以副朕軫恤百姓至意○安遠靖寇大將軍貝

勒察尼奏岳州調發兵六千名請設隨征左右前後四營總兵官分轄從之○己酉賑安徽鳳陽旱災○辛亥廣東廣西總督金光祖奏廣西藤縣失陷賊三路僞犯梧州上命大將軍平南王尙之信將軍舒恕遵前旨親統官兵倍道往梧州應援○先是議調總兵官高登科率標兵協守茶陵攸縣諸處至是巡撫佟國楨奏逆孽攻陷德興侵偏樂平該府縣官力請留鎮臣駐守饒郡上命高登科及部下官兵不必調遣湖南仍留饒郡與該督撫提督等速復德興務滅逆寇○平南王尙之信奏副都統金榜選等率兵剿雷州土寇於康熙十七年十一月十四日攻開草塘關二十一日敗僞副將陳奇等復徐聞縣追賊至海安僞副將葉可昌等棄城登舟二十三日復錦囊城斬賊一百七十餘名救回難民萬餘瓊州路通得旨嘉獎下部議敘○乙卯以朱裴爲工部右侍郎

由左副都御史遷

○丁巳甯南靖寇大將軍順承郡王勒爾錦奏新增兵

一萬二千名請設隨征前後左右四營總兵官分轄從之○己未安遠靖寇大將軍貝勒察尼詹事宜昌阿等奏逆賊吳應麒等竊踞岳州堅壘死守前奉 聖諭命臣等多調舟師水陸圍困斷其糧道逆賊勢蹙僞總兵王度冲僞將軍陳珀等於本月十八日各以其舟師來降吳應麒等棄城遁遂復岳州 上諭大兵取岳州逆賊震動之際其令諸路大將軍王貝勒等剿撫兼施賊有悔過投誠者免罪敘功錄用將此恩意概行曉諭○復設廣東潮州水師總兵官○壬戌賑河南陳留等二十一州縣饑○諭兵部朕聞大將軍順承郡王以提督佟徽年侵剋兵餉八百兩遂羈繫之提督乃國家大臣王何得私行羈繫況佟徽年原係世家豈肯私行侵剋此事當詳察之○奉命大將軍康親王傑書奏逆賊劉國軒

等率賊兵八千至郭塘歐溪頭地方立營欲斷江東橋以犯長泰都統賴塔與總督姚啟聖提督楊捷等統兵直逼賊營令副都統紀爾他布巡撫吳興祚等領兵擊之大敗逆賊劉國軒吳淑何祐等追至江邊斬首二千餘級生擒偽總兵一名偽副將二名獲器械無算下部議敘○甲子諭兵部頃筆帖式馬爾泰去時令其傳諭諸將軍今岳州既經克復應發兵一支從荊河口渡江立營於華容石首之地以爲根基若由華容石首前往常德澧州一路水潦難行且諸將軍亦曾奏此路水澤甚多艱於前進今在岳州滿漢官兵甚多宜乘賊未及固守湘陰之先水陸並進乘機急取湘陰卽望長沙進發若少遲疑觀望則賊堅守城池湘陰江中有洲恐賊立營其上豫備火器我舟師欲過甚難不可不乘其未及堅守城池江洲之先急取湘陰也岳州地最險阻偏師足守其取湘

陰往長沙應令貝子章泰署前鋒統領杭奇率每佐領滿洲甲兵
十名提督桑峨總兵官萬正色全率所部兵並多發綠旗兵整備
大礮鳥槍火器水陸夾攻著行文大將軍貝勒及安親王等知之
○乙丑 皇予萬黼黻○是月免浙江西安等五縣旱災江南宿
遷等七縣水災額賦

二月丙寅朔鎮南將軍莽依圖奏逆賊吳世琮等犯梧州臣同傅
宏烈等率兵拒戰大敗之賊棄營夜遁下部議敘○丁卯以馬汝
驥爲左副都御史

由宗人府
府丞遷

○撫遠大將軍都統大學士公圖海

自陝西軍中來京陛見 上遣禮部侍郎額星格齎茶酒出德勝

門迎勞之○戊辰定遠平寇大將軍安親王岳樂等奏岳州恢復
長沙逆賊震恐於正月二十九日棄城遁我師入城安撫人民

上諭岳樂乘機取衡州貝勒察尼等速發大兵多撥船礮迅赴長

沙尋岳樂等奏賊離衡山縣二十里許水陸立營 上復諭宜乘賊寇驚動之際速取衡州此剿滅衡州賊眾較諸處不同所調岳州舟師火器早至一日於大事有一日之益調遣船礮官兵如或稍遲使賊江中置樁豫爲堅守阻我舟師致遲進取衡州事機則皆貝勒察尼誤之也諭到貝勒察尼卽撥舟師火器速發安親王軍前於滅賊機宜勿致有誤其大將軍簡親王等亦已率兵進取衡州兩軍相合之後總用大將軍安親王印信協力剿滅逆孽恢復衡州諸路如有分兵之處仍各用大將軍印信施行○己巳諭戶部江西舊欠錢糧屢經督撫及科道等官奏請蠲免朕已洞悉但當逆賊煽亂之時各省地方與賊接壤者被其侵犯迫而從逆情非得已故於平定之後其舊欠錢糧悉行蠲免江西於賊未到之先地方奸徒輒行倡亂廣信南康饒州奉新甯州宜黃安仁永

新永豐彭澤湖口瀘溪玉山鉛山等處所在背叛忠義全無紳衿
兵民人等或附和嘯聚抗拒官軍或運送糧米助張賊勢或布散
僞劄煽誘良民或窩藏奸細潛通消息輕負國恩相率從逆以致
寇氛益熾兵力多分遲延平定之期勞師費餉揆厥所由良可痛
恨卽今田廬蕩析家室仳離皆其自作之孽逋賦未蠲職此之故
但思逆寇漸經殲除地方凋敝舊欠追比民困愈深朕心殊爲不
忍其康熙十六年以前舊欠錢糧著盡行蠲免爾部行文該督撫
通行曉示務使小民均沾實惠以昭朕愛養百姓至意○禮部題
朝鮮國貢使失火燒毀布疋應行文令該國王察議其布疋下次
補進得旨使臣免察議布疋亦免補進○癸酉先是海逆鄭錦乘
耿精忠叛竊據漳泉諸郡後耿精忠降諸郡以次收復鄭錦屢敗
仍遁入海而廈門金門猶爲所據上欲乘勝蕩平海逆乃厚集

舟師規取廈門金門二島以圖澎湖臺灣又以曩時征取廈門金門曾用荷蘭國夾板船特諭荷蘭國王令具夾板船二十艘載勁兵協力攻取二島至是奉命大將軍康親王傑書等議奏戰艦水師未備荷蘭國舟師又不能豫定來會時日海賊見據海澄廈門之固勢難急圖上諭征剿海寇調發滿洲綠旗官兵甚多福建經制兵外又增兵數萬授水陸提督爲將軍以統之宜乘此兵力速行進討若如大將軍康親王所奏需以歲月則供億煩費必將撤還大軍海寇何由殄滅其令康親王會同將軍總督巡撫提督等詳議以聞○安遠靖寇大將軍貝勒察尼等奏賊渠吳應麒等從岳州遁去輔國公溫齊等率兵追殺三百餘里斬賊甚多我兵因未攜爨具而還上責之曰逆賊吳應麒等迫於饑餓徒步敗遁我騎兵追躡二百餘里因未攜爨具遂爾還師並未大敗賊眾

岳州雖得不過賊所棄之空城而窮寇吳應麒究未擒斬朕心未
愜今以追殺賊眾地方里數度之虛實卽立見矣○平南王尙之
信等奏臣等共議將軍莽依圖舒恕等同將軍傅宏烈守梧州臣
駐封川縣總督金光祖駐肇慶府將軍額楚等駐德慶州如有機
會一面奏聞一面舉行 上諭今長沙岳州諸處俱已恢復僞將
軍總兵文武官員船艦兵卒來歸者甚眾又彝陵州對岸之鎮荆
山盤踞賊寇盡行潛遁分逐諸路潰敗之賊多所斬戮大將軍順
承郡王等已渡江平定湖南安親王又進取衡州諸處宜乘此各
路賊寇渙解之際平定廣西大將軍平南王尙之信將軍莽依圖
舒恕額楚傅宏烈總督金光祖等勿失事機速定廣西○安遠靖
寇大將軍貝勒察尼奏都統覺羅朱滿等率兵抵湘陰環城立營
正擬攻取賊眾棄城遁我軍分二隊追擊擒斬賊兵無算復湘陰

縣得旨嘉獎下部議敘○湖廣提督桑峨奏臣與撫遠將軍貝子章泰各領兵進取華容石首二縣賊眾望風棄城奔竄我兵入城○乙亥 上率王大臣詣 太皇太后宮補行慶賀禮親撰表文詩篇書 萬壽無疆扁額恭進○ 上御經筵○命江西總督董衛國率標兵速赴大將軍安親王軍前聽王調度協力進取衡州諸處○奉命大將軍康親王傑書等奏據福建總督姚啟聖等啟進取廈門金門須發江浙巨艦二百艘增閩省兵二萬迅調荷蘭舟師來會方可大舉進剿之期必俟入秋北風起後彼時戰艦師旅一切不誤自能奏功得旨剪滅海寇事綦重要其令江南浙江總督京口將軍發江浙戰艦各百艘於進剿期內送至福建仍許福建增兵二萬大將軍康親王等並檄荷蘭國迅調舟師務令如期而至○丙子定遠平寇大將軍安親王岳樂奏前鋒參領沙納

哈等率兵至湘潭賊望風遁復縣城得旨嘉獎下部議敘○戊寅

以余三級爲山東按察使

由湖廣驛鹽道運

○辛巳甯南靖寇大將軍順

承郡王勒爾錦奏臣聞岳州賊潰卽遣署副都統多莫克圖等率

師前進於正月二十七日渡江太平街虎渡口諸賊悉皆潰遁臣

率大兵於二十九日渡江次建始於是前隊官兵分路進剿松滋

枝江宜都諸縣及澧州以次恢復守百里洲僞將洪福率舟師繳

僞印劄降得旨嘉獎下部議敘○諭議政王大臣等今岳州彝陵

之賊以舟來降長沙之賊焚舟潰遁諸處賊寇困蹙逃竄無有舟

楫宜固守荆襄乘機速滅賊黨貝勒察尼酌留官兵於岳州水陸

齊進速會順承郡王軍合力亟取常德沅州鎮遠諸處至恢復常

德諸郡之後順承郡王勒爾錦貝勒察尼等會同安親王簡親王

等作何進取雲貴定議具奏其大兵進討雲貴宜設將軍總督巡

撫提督隨大兵進剿吏部兵部開列應補者以聞尋吏部兵部以應補官列名具奏 上諭雲南將軍不必添設可調湖廣提督桑

峨爲雲南提督湖南提督趙賴爲貴州提督四川總督周有德爲雲貴總督以原任雲南巡撫李天浴爲雲南巡撫副都御史楊雍建爲貴州巡撫○壬午諭吏部朕以萬幾之暇留心經史思得博學鴻儒備顧問著作之選故特頒諭旨令內外諸臣各舉所知膺薦人員已經陸續到部欲行考試因天寒暑短恐其難於屬文弗獲展厥蘊抱今天氣已漸融和應定期考試所有應行事宜爾部會同翰林院詳議具奏○癸未予吳逆下投誠事洩被戮僞將軍杜輝祭一次○甲申撫遠大將軍都統大學士公圖海仍赴陝西上遣禮部侍郎楊正中齎茶酒送之於廣甯門外○乙酉 上諭刑部民閒鬻身爲廝養者多藉口投充營伍挾制家長勒索身

契及妻子財物又有桀黠之徒乘戎馬往來之際發人墳墓或利所有或挾私仇其情罪尤屬可惡著嚴議具奏尋議背主投營勒索身契及妻子財物者照光棍例治罪其無挾制勒索等情者枷責給還家長乘機發冢見棺毀棺見屍索財取贖者論流徒絞斬如律又營將知其背家長而不舉發者分別專營兼轄統轄謫調鐫級有差不知而不舉發者奪俸從之○丙戌安遠靖寇大將軍貝勒察尼奏提督桑峨遣守備吳榮進取安鄉縣賊眾悉遁僞員外郎等三員詣軍前投誠○予肇慶陣歿守備翟永昌官廕○庚寅上至叢華城行孝昭皇后期年致祭禮是日回宮○壬辰甯南靖寇大將軍順承郡王勒爾錦奏本月十四日臣抵澧州遣貝子準達等進取常德未至之先賊縱火焚城中廬舍並江中船艦而遁僞按察使陳寶鏞等迎降我師於十八日入常德府城又

奏慈利石門二縣九溪永定二衛僞總兵黃志功僞巡撫李益陽等率眾投誠○癸巳吏部議覆左都御史魏象樞奏學道考試十弊一童生府考無名徑取入學二額外溢取童生撥發別學三私查印簿某卷某號卽某人以便賄賣四解部冊籍遲延更改等第五先開六等草單嚇詐保等銀兩六將文童充武童入學後黃緣改武爲文七將生童遠調考試入縱容教官包攬通賄九曲徇情面孤寒棄斥十將額外溢取童生混附生員冊內報部以上十弊允當嚴禁應如所題嗣後考覈學道俱注剔除十弊具題從之○甲午吏部議覆江西巡撫佟國楨奏楊梅土城被賊眾圍困焚殺巡檢宋淩奮身拒賊夫婦子姪並僕六人同被焚死應照例贈主簿從之○揚威大將軍簡親王喇布奏臣遣前鋒統領希佛等進取衡州是月十三日夜半抵城下署前鋒參領戴屯等奪門入城

逆賊吳國貴夏國相等驚遁遂復府城得旨嘉獎下部議敘○廣東廣西總督金光祖奏廣西舊設提督標下官兵四千六百餘人自馬雄變後未及復設當此用兵之際必仍設提督總統水陸之兵方於戰守有賴其提標應設官兵卽於廣西見在各營抽撥補入經制從之○乙未 皇子生逾期年而薨未命名

三月丙申朔試內外諸臣薦舉博學鴻儒一百四十三人於體仁閣賜宴試題璿璣玉衡賦省耕詩五言排律二十韻○丁酉 上幸保定縣行圍○吏部議覆御史范承勳奏定例降調官員果係清廉良吏許督撫題請留任原爲愛惜人材起見故雖降調以示懲而又題留以示勸至革職與降調雖稍有重輕同一誣誤請將誣誤革職之員果有潔己愛民者督撫覈實許與降調官員一體題留嗣後誣誤革職官員內果有清廉愛民者未經離任許督撫

保留若離任具題者不准從之○安遠靖寇大將軍貝勒察尼奏
僞總兵王度冲等統官兵船艦投誠宜從優議敘伊等願改陸路
效用 上諭僞總兵王度冲僞將軍陳珀可爲總兵官俱兼右都
督僞總兵龍鎔張宣柯喬棟可爲總兵官俱兼都督僉事令彼等
俱入陸路同大兵效力○揚威大將軍簡親王喇布奏僞總兵卓
英率僞官八員兵丁四千名投誠下部議敘○征南將軍都統穆
占奏僞總兵李魁等文武官七十餘員率領兵丁家口投誠下部
議敘○戊戌再發帑賑安徽鳳陽○裁湖南提督仍設湖廣提督
一○昭武將軍福建提督楊捷奏臣會同平南將軍賴塔等於下
坑山等處擊敗逆賊擒斬甚多下部議敘○揚威大將軍簡親王
喇布奏夸蘭大阿進泰等進取祁陽縣直逼城下賊眾惶懼登舟
我兵奮擊擒斬無算僞總兵都督同知董世興等迎降恢復縣城

得旨嘉獎下部議敘○丙午予湖廣陣亡遊擊傅桂芳官廕○征

南將軍都統穆占奏臣等追擊常甯縣賊眾偽將軍郭應甫等迎敵我兵奮勇前進陣斬八百餘級餘賊悉遁復縣城總兵官李國棟至新田縣賊眾敗遁復縣城得旨嘉獎下部議敘○揚威大將軍簡親王喇布奏二月初七日遣署副都統雅哈喇等進取耒陽縣十五日復調提督趙賴標兵前往夾攻賊眾敗遁恢復縣城得旨嘉獎下部議敘○丁未甯南靖寇大將軍順承郡王勒爾錦奏二月十九日副都統莽奕祿進取桃源二十一日偽知縣張文明等投誠永定營偽副將楊達武率標下官七員兵五百名下崗宣撫司向日葵等土官十七員俱呈繳偽印投誠下部議敘○己酉上還宮○免陝西新復州縣康熙十四年賦○庚戌諭議政王大臣等今湖南賊寇悉已敗遁順承郡王勒爾錦與貝勒察尼等

合兵一處簡親王方在衡州穆占已至永州進取廣西事屬最要順承郡王等所部兵爲數甚多可撥每佐領護軍二人驍騎二人令貝子章泰率往安親王軍前安親王親統大兵前赴衡州進取寶慶諸處簡親王可與穆占等合兵自永州進定廣西○奉命大將軍康親王傑書等奏臣等已將徵調舟師敕諭令荷蘭國人嚮往因趕塘石碑洋諸地爲海寇所阻不得行故未達而還上諭頃因定海舟師少已特增兵今荷蘭國人爲寇所阻何以不行撲滅俾得前行音問既未能通舟師必不能如期而至如此則我兵遇有機會可不俟荷蘭舟師卽進剿耶抑必俟彼船至日方舉事耶茲以剿蕩海寇增調師旅修理戰艦糜費軍餉甚多大將軍王等宜規取廈門金門速靖海氛不必專候荷蘭舟師○甲寅福建總督姚啟聖奏僞總兵廖璵黃靖等率眾踞水晶坪聯絡山海賊

寇爲害地方臣遣官招撫廖瑛等率僞官三百餘員兵一萬二千餘人詣軍前降下部議敘○丙辰諭兵部我國家開闢大業軍法最爲嚴明凡擊斬賊眾攻取城池必據實奏報復行確覈功罪昭著從無虛僞冒功之弊今自用兵以來每覽各處奏捷章奏其中固有實建功績者亦有虛詞妄報者如擊敗賊兵動稱斬殺甚多或云數千或云萬餘或云不計其數甚至賊棄空城尙云如何攻取如何恢復妄行虛報微功小寇任意鋪張議敘之時冀幸濫邀升賞殊非人臣事上勿欺實心爲國之誼嗣今諸領兵大將軍將軍督撫提鎮等務期洗心滌慮勿蹈前轍凡報捷必確覈功績據實上聞如因循陋習冒濫軍功定以軍法從重治罪必無寬貸爾部卽通加嚴飭並曉諭官兵一體遵行○征南將軍都統穆占等奏賊渠吳國貴等遁往永州爲守城計臣遣官兵追及之於白水

市諸處擊敗賊眾斬殺甚多是月初九日遂復永州於是道州永
明江華東安等縣所有之賊俱棄城遁得旨嘉獎下部議敘○丁
巳揚威大將軍簡親王喇布奏衡州諸郡既復提督趙賴往取寶
慶府賊先於城內外縱火而遁我兵於是月初五日入城○戊午
賜歸允肅等一百五十一人進士及第出身有差○己未廣東廣
西總督金光祖奏潮州地方濱海賊艘出沒臣遣提督侯襲爵大
敗海賊楊金目等於山頭仔斬首千餘沈燒賊船二百餘隻下部
議敘○庚申岳州陣亡諸將喪至遣侍衛薩哈達等十二員齎茶
酒致奠○辛酉諭禮部祈雨○癸亥諭兵部逆賊從湖南敗遁日
久我大兵卽當尾擊若推諉逡巡不速行追躡俾賊復得固守則
勞費倍多乃順承郡王等至今猶未亟進殊爲不合爾部速移文
順承郡王等乘賊守備未固兼程前往○甯南靖寇大將軍順承

郡王勒爾錦奏彝陵後營遊擊許嘉謨等於二月二十二日率兵至青石渡賊首潘龍等迎敵我兵左右夾剿追至平峪鋪斬首及落崖死者無算復興山縣二十六日進取歸州賊首廖進忠等率賊數千於馬黃山迎敵我兵三路夾攻賊眾向巴東逃遁二十七日看守巴東僞副將金勒等投誠守備于騰雲等領兵前往正遇金勒等與賊對壘我兵衝擊追至西壤大敗賊眾歸州巴東相繼恢復得旨嘉獎下部議敘○甲子諭吏部薦舉到文學人員已經親試其取中一等彭孫適倪燦張烈汪彰喬萊王頊齡李因篤秦松齡周清原陳維崧徐嘉炎陸業馮勛錢中諧汪楫袁佑朱彝尊湯斌汪琬邱象隨二等李來泰潘耒沈珩施閏章米漢雯黃與堅李鎧徐欽沈筠周慶曾尤侗范必英崔如岳張鴻烈方象瑛李澄中吳元龍龐塏毛奇齡錢金甫吳任臣陳鴻績曹宜溥毛升芳曹

禾黎騫高詠龍變邵吳遠嚴繩孫著纂修明史其見任候補及已仕未仕各員作何分別授以職銜其餘見任者仍歸原任候補者仍令候補未仕者俱著回籍內有年老者作何量給職銜以示恩榮爾部一併詳議具奏告病者不必補試

夏四月丙寅以鄖陽撫治楊茂勳爲四川總督仍駐鄖陽俟四川恢復日赴任○戊辰以旱命大學士清理刑獄並遣法司官會直隸各省撫臬察審重犯○湖廣岳州水師總兵官萬正色奏閩海情形水陸戰守機宜上諭萬正色剿寇洞庭著有勞績今岳州長沙諸處悉已恢復無煩水師且萬正色閩人稔知水性茲剿滅海寇之際從優加太子少保調爲福建水師總兵官率所部官兵剋期速赴閩中其標下兵有不諳水性者仍留岳州以見在投誠兵內習水性者補額攜往至閩之日卽以所條奏事宜與大將軍

康親王等會議酌行旋以萬正色爲福建水師提督統轄全閩水師營務○刑部尚書劉捷以病乞休允之○庚午貴州提督趙賴奏逆賊胡國柱郭壯圖吳國貴吳應麒輩嫌隙已生勢不兩立宜乘渙散之會指名招徠 上諭諸路大將軍等乘逆賊互相猜疑

之際其明諭以投誠人員寬貸前罪從優恩擢賊中渠帥分路遣人指名招撫○辛未安塘筆帖式報僞將軍王鳳岐等三人選船艦兵卒水陸齊下截禦巴東諸處以乘不備又有劉李楊王諸賊帥率眾屯踞巫山及草毛諸處 上諭逆賊至巫山潛生奸計或俟江水泛漲之時乘虛突犯彝陵荊州殆未可定今固山貝子準達都統根特等已率兵前赴荊州而彝陵又有大兵及提督徐治都在彼宜悉錄報文移貝子準達等提督徐治都令於荊州彝陵諸處水陸密防賊果來犯卽行剿禦○甯南靖寇大將軍順承郡

王勒爾錦奏都統覺羅巴爾布啟稱二月初二日分兵二隊攻金頂山及灘內所立之營兵鋒一至賊皆遁走署護軍統領董吉等率兵由陸路追之及於南津關口江北岸之賊列陣迎拒我兵敗之斬殺甚眾 上諭國家軍令本甚嚴明凡攻逐賊寇大臣身先士卒是以官兵鼓舞奮勇野戰必勝攻城必克所向無敵都統巴爾布統兵駐彝陵大兵既復岳州不於賊方震動之時偵察虛實卽行剿滅乃稱二月初二日分兵二隊攻取金頂山及灘內所立之營兵鋒一至賊悉遁走身統兵眾偪賊而營對壘之賊已遁尙爾不知又不自思贖罪率官兵疾追殄殲賊醜止遣董吉等前往巴爾布自率兵赴荊以來會未奮力報效遲誤觀望其罪良多既至彝陵與賊對壘不躬親抵敵反云初二日撥兵前進作攻戰之形明屬欺罔且鎮荆山之賊遁於何處踞於何地並未察明以報

著順承郡王等一一嚴取供詞以聞○戊寅征南將軍都統穆占奏臣自辰州啟行追賊二十日會大雨泥湍馬斃甚多致兵士乏騎得旨穆占與大將軍簡親王進定廣西宜速撥武昌馬千匹送至穆占軍前以給乏馬兵士○己卯旱甚上親步禱於天壇應時大雨○甯南靖寇大將軍順承郡王勒爾錦等奏僞將軍胡國柱在辰龍關僞將軍吳應麒等在辰州以木塞隘口而營上

責之曰順承郡王勒爾錦等當逆賊驚遁之際宜亟遣賢能將帥

追剿乘賊不備速行撲滅乃明知巴爾布怯懦令率官兵進取辰

州巴爾布遲滯觀望延引時日不疾驅而進致辰龍關復爲賊守

勒爾錦巴爾布等宜卽行議處但見統大兵征剿俟事平凱旋之

日再行察議○庚辰調邵甘爲兵部督捕左侍郎由倉場調○轉禪塔

海爲刑部左侍郎以宜昌阿爲刑部右侍郎由詹事遷○辛巳上出

德勝門觀禾路經固倫端順長公主及輔政大臣一等公索尼墓

遣內大臣武默納各以酒奠之○以覺羅舒恕爲左都御史

由吏部左

侍郎焦毓瑞爲左副都御史

由通政使遷

○壬午諭議政王大臣等覽

學士孔郭岱等報廣西悉已底定宜速移文令簡親王及穆占等之兵不必進廣西但莽依圖舒恕額楚等兵力稍單簡親王及穆占等兵內選有馬精兵每佐領三人或四人遣前鋒統領希佛率赴莽依圖等軍前於通雲南要路宜從何路協力前進公議進發至於廣西見無官兵平南王或宜同大兵前進或宜駐廣西適中要地亦同將軍大臣等共議而行其彝陵兵徒爾坐守似屬無用宜整繕甲兵自歸州巴東作進兵狀以制之巴爾布本在彝陵卽遣彼往歸州巴東效力並令都統噶爾漢等率兵同總督楊茂勳提督佟國瑤等前進宜由何路協力撲滅山賊或規取興安聽其

酌便而行○福建總督姚啟聖奏木武鎮僞總兵陳士愷率僞文武官五十五員兵一千四百三十一名投誠下部議敘○河道總督靳輔奏清水潭屢塞屢衝山陽高郵等七州縣田畝淹沒臣築東西長隄二道工竣七州縣田畝全行涸出運艘民船永可安瀾報聞○福建總督姚啟聖奏海逆僞總兵鄭奇烈率僞官五十三員兵丁千餘投誠下部議敘○乙酉敕諭雲南貴州大小文武官員軍民人等逆賊煽亂以來爾等被其迫脅陷身賊中莫能自拔地方百姓久遭荼毒誅求苛擾困苦日深在彼情形朕已洞悉每一念及深爲惻然故屢頒敕諭廣示招徠開以自新之路今湖南悉皆平定廣西亦已納款獨爾滇黔一隅民生尙在水火之中朕以仁覆天下爲心豈忍西南萬姓顛連無告莫之拯救且當時倡叛罪止吳三桂一人所屬人員均係脅從情可矜恕今特頒敕諭

再行招撫爾等其各體朕寬大好生之心翻然悔悟爭先來歸於各路大將軍將軍等軍前投誠皆赦其前罪論功敘錄加恩安插令之得所爾等勿得仍懷疑畏坐失事機有負朕嘉與維新至意○揚威大將軍簡親王喇布奏僞副總兵周嘉貞率僞文武六十一名兵丁九千三百四十餘名家眷六千五百餘名口投誠下部議敘○廣東廣西總督金光祖奏逆賊吳世琮等踞潯州府聞大兵前進卽焚營棄城遁副將林大忠入城撫定人民○丙戌諭兵部湖南廣西已經底定滇黔指日蕩平凡在京在外大小文武官員內有家口陷於賊中者有子身投誠家口仍在彼地者有前以抗賊被害而家口尙有遺留者大兵到日一一清察務加保全俾之得所聽其家屬完聚爾部卽通行傳諭各路大將軍將軍督撫提鎮等遵行○諭兵部逆賊吳三桂煽亂以來各處大小文武官

員其或勢窮力竭迫而從賊朕久已洞悉其悔罪來歸者概行寬

宥惟祖澤清父子兄弟向受國家恩養甚厚前祖澤清叛時意其

必係被賊迫脅不得已而從逆及其既降復叛則甘心附賊可知

情罪重大國法難容不許招撫亦不許其投誠爾部卽密諭各路

大將軍將軍督撫提鎮等遵行○丁亥以魏象樞爲刑部尙書

都尙史遷

○征南將軍部統穆占奏臣遣右營遊擊張德恩等復灌陽

縣都督僉事純輔弼等復興安縣投誠僞總兵陳邦賢復全州得

旨嘉獎下部議敘○戊子轉哲爾肯爲吏部左侍郎以屯泰爲吏

部右侍郎

由內閣學士遷

○以喀爾圖爲倉場侍郎

由左副都御史遷

○庚寅免

江南康熙十二年以前逋賦○壬辰甯南靖寇大將軍順承郡王

勒爾錦奏將軍鄂內等啟稱遣署副都統圖爾度渾等偵探辰龍

關賊情形賊跨路連設五營力爲堅守山險林深前鋒未得擒獲

生口距辰龍關二十里止行一馬且不能轉旋辰龍關一帶山俱峻險林木森密徒步亦不易至且時值盛暑淫雨雖大兵前進亦不能行不如暫留爲便 上諭辰龍關乃通雲貴孔道眾皆知之甚悉據奏辰龍關相距二十里止行一馬且不能轉旋辰龍關一帶山俱峻險林木森密徒步亦不易至俟復辰龍關時必於此路明白丈量苟與所奏不符圖爾度渾等從重治罪今當廣西全定敗賊逃竄之際宜分路前進底定疆宇前鋒屬在顏行捕獲生口乃其專責順承郡王委無能之圖爾度渾爲副都統俾之前行致前鋒不能捕一生口圖爾度渾等乃又急行退還順承郡王勒爾錦可率其王府佐領之兵還赴荊州率巴爾布等進定歸州巴東圖爾度渾可革去署副都統職以參領隨順承郡王還荆貝勒察尼仍用其原大將軍印統兵平定地方○是月免宿遷水災逋賦

五月乙未左都御史升刑部尚書魏象樞奏請仍留左都御史任

庶得勉竭愚悃激濁揚清爲朝廷振肅綱紀得旨魏象樞著加刑

部尚書銜仍留左都御史任○丁酉以佛倫爲內閣學士

由大理寺卿遷

○征南將軍都統穆占奏千總陳有聲等領兵進取碁城縣僞知

縣張魁臣以城降下部議敘○己亥轉田六善爲戶部左侍郎調

朱裴爲戶部右侍郎

由工部調

○辛丑以解佛爲內閣學士

由內閣侍讀學士遷

○壬寅

上出阜成門觀禾○癸卯遣官封洞庭湖神○丁未征

南將軍都統穆占奏廣西投誠僞將軍劉彥明徐洪貞線成仁等

仍爲都統副都統令其總轄原管之兵及線旗之兵頗於事有益

得旨劉彥明等所領投誠線旗兵內有願歸農者皆令歸農願入

伍者撥入廣西經制兵內其定南王下舊兵有老弱者裁去不必

足從前三千之額數年以來定南王官兵分散各處收聚甚難宜

令督捕理事官麻勒吉前赴廣西暫行統轄定南王下藩兵有分散者令其察訪料理一切調度軍務會同將軍莽依圖等商議舉行其廣西文武各官並定南王下各官職名麻勒吉俱察明繕冊以聞劉彥明等爲都統副都統之處俟冊到日再議○己酉揚威大將軍簡親王喇布奏僞將軍全鉞僞總兵馬隆興熊天章率眾投誠下部議敘○庚戌授薦舉博學宏詞邵吳遠爲侍讀湯斌李來泰施閏章吳元龍爲侍講彭孫遹張烈汪彩喬萊王頊齡陸棻錢中諧袁佑汪琬沈珩米漢雯黃與堅李鎧沈筠周慶曾方象瑛錢金甫曹禾爲編修倪燦李因篤秦松齡周清原陳維崧徐嘉炎馮勛汪楫朱彝尊邱象隨潘耒徐鉉尤侗范必英崔如岳張鴻烈李澄中龐塏毛奇齡吳任臣陳鴻績曹宜溥毛升芳黎騫高詠龍燮嚴繩孫爲檢討○以馬汝驥爲倉場侍郎由左副都御史遷○奉命大

將軍康親王傑書奏海賊偽總統劉國軒等侵犯江東橋平南將軍賴塔等統官兵迎擊賊敗走太平寨追殺千餘下部議敘○揚威大將軍簡親王喇布奏吳三桂偽侍郎范思徵偽總兵曾大捷等投誠○辛亥命加副將徐升耀都督僉事齎敕招撫王屏藩等敕曰自吳逆煽亂以來所在官民多被誘惑陷身賊中莫能自拔朕已洞悉情形屢頒敕諭廣示招徠開以自新之路念爾等素受國恩必非甘於從逆或心存忠義遲回有待或勢被驅迫歸化無由朕深憫焉茲湖南廣西俱經恢復各路兵馬齊進滇黔爾所悉知四川一隅皆朕赤子久罹兵燹不得早見太平每一念及殊用惻然特遣副將加都督僉事徐升耀前往宣布朕意爾其翻然改悟勿失機會率先來歸朕必赦其前愆論功敘錄爾無懷疑畏勉圖後效以副朕定亂安人至意○癸丑吏部議覆揚威大將軍簡

親王喇布奏原任湖廣益陽縣知縣授參議道割付徐璫齋諭招撫吳三桂僞將軍胡國柱夏國相馬寶等被殺請敕議敘今奉旨議得徐璫冒險招撫捐軀盡忠應照例贈湖廣按察使司僉事予祭葬廕一子入監讀書從之○予故原任兵部右侍郎李贊元祭葬○甲寅直隸各省督撫遵例自陳得旨江西巡撫佟國楨著降二級調用甘肅巡撫鄂善著解任廣東巡撫佟養鉅著革職○先是湖南用兵令江南造烏船百艘送岳州軍前至是岳州旣復無須舟艦上諭議政王大臣等萬正色赴閩時卽令其領在岳烏

船並水手以行至江南浙江更選戰艦共百艘攜往以資征剿○

丙辰贈廣西陣亡都司吳錫綬官廕○己未命內閣學士徐元文

爲明史監修總裁官掌院學士葉方藹右庶子張玉書爲總裁官

○以穆臣爲左副都御史

由山西按察使遷

王日藻爲浙江按察使

由河南管

河道

○安遠靖寇大將軍貝勒察尼奏臣等前進雲貴荆岳彝

諸處相隔漸遠調遣防守事宜必致有誤 上諭大將軍貝勒察

尼等親總大兵前往進剿自澧州以南軍務聽大將軍貝勒察尼

調度荊州岳州彝陵襄陽等處軍務聽大將軍順承郡王調度○

辛酉鎮南將軍莽依圖奏桂林相近之兵請速調一支往駐桂林

以張聲勢臣俟副都統額赫納兵至貴縣卽前赴橫州以絕柳州

南甯之路 上命簡親王及穆占等兵內撥每佐領三人或四人

遣一副都統率赴麻勒吉所令麻勒吉統轄鎮守桂林○壬戌

上出朝陽門觀禾○轉馮甦爲刑部左侍郎以焦毓瑞爲刑部右

侍郎

由左副都御史遷

六月甲子朔以施維翰爲左副都御史

由宗人府丞遷

○丙寅廣西巡

撫馬雄鎮之子馬世濟奏請赴粵西取父骸骨得旨馬雄鎮當地

方叛亂之時不肯從逆克篤忠貞捐軀殉難深爲可憫其骸骨並
家口令馬世濟馳驛前往搬取仍著麻勒吉等豫爲察明料理交
與馬世濟到日從優議卹○庚午命吏部尚書黃機以吏部尚書
管刑部尚書事○以安世鼎爲江西巡撫由湖南布政使遷巴錫爲甘肅
巡撫由陝西布政使遷李爲霖爲雲南按察使由湖北糧道遷○辛未諭戶部民
生以食爲天必蓋藏素裕而後水旱無虞自古耕九餘三重農貴
粟所以藏富於民經久不匱洵國家之要務也比以連年豐稔粒
米充盈小民不知積粟恣其狼戾故去年山東河南一逢歲歉卽
以饑饉流移見告雖議蠲議賑加意撫綏而被災之民生計難遂
良以地方有司各官平日不以民食爲重未行申明勸諭之故近
據四方奏報雨澤霑足可望有年恐豐熟之後百姓仍前不加撙
節妄行耗費著各該地方大吏督率有司曉諭小民務令力田節

用多積米糧俾俯仰有資凶荒可備以副朕愛養斯民至意○揚威大將軍簡親王喇布奏僞總兵姜繼向彭萬里鍾爾宏等率領將弁兵丁家口投誠○壬申平南王尙之信奏粵東之變起自新會江門江門水師之叛由於逆弁趙天元一人請以趙天元賜臣使得明正其罪立置典刑 上諭趙天元不思圖報國恩乘粵西逆賊侵犯粵東首獻江門背叛致粵東變亂及粵東歸正後又從逆賊數犯疆圉今度不能免脫窘困至極方始來降情罪重大趙天元本係平南王所屬之人王其立誅之○甲戌安遠靖寇大將軍貝勒察尼等取都統巴爾布供辭以聞 上命議政王大臣等集議尋議奏都統覺羅巴爾布自率大兵往湖南以來並未前進效力因其怯懦削去參贊令其贖罪圖功乃身率大兵坐駐彝陵大兵旣復岳州不乘賊中震駭之時探其虛實力行剿滅以贖前

愆鎮荆山對壘之賊迄於逃遁竟未之知乃誑云分布官兵進攻巧爲飾辨又不親身追殺逸寇止遣夸蘭大二人前往其後令巴爾布率領官兵攻取辰州又遲回瞻顧遷延時日竟不速進致賊復踞辰龍關得爲守備巴爾布怯懦退縮一步不能前進貽誤大事失機甚多今奉旨取供巴爾布又不卽行認罪據實供招反爲巧飾殊失大臣之體宜將巴爾布都統阿達哈哈番佐領及所加之級盡行削去羈繫荆州彼所襲拜他喇布勒哈番與應襲之人承襲從之○丁丑廣東廣西總督金光祖奏欽州遊擊劉世貴於四月二十三日進取靈山縣僞將軍郭義以城降下部議敘○戊寅平南王尙之信奏五月二十六日僞將軍馬承蔭總兵齊人龍等來降○己卯以柯鼎爲貴州布政使李輝祖爲貴州按察使俱

郎中

○江西提督許貞奏饒南總兵官高登科等及浙省官兵會

剿玉山賊連次奏捷生擒僞總兵曾文瑞陣斬僞總兵柯伯龍等
十員僞都督陳輝投誠下部議敘又奏臣率兵進剿洪山詹源江
許山賊巢前後陣斬僞官二十五員賊兵二千四百有餘下部議
敘○庚辰以郝浴爲左副都御史

由左僉都御史遷

○壬午鎮安將軍噶

爾漢奏臣等率領官兵偪臨賊境見山高路狹草木叢塞今值六
月時多霪雨若山水暴下則魚貫之兵必致斷絕不能相顧且輓
運亦難是以暫撤兵眾俟木落水涸更率官兵先滅山寇續取興
安上諭噶爾漢自任將軍以來初無勞績惟閒住襄均諸處今
當逆賊震動之時遣噶爾漢會同總督提督等剿滅山寇或有克
取興安之機酌便而行乃不率兵破賊以圖報效反稱草木叢塞
竟以兵還若此當草木未盛之先亦曾效力前進否噶爾漢不行
努力以贖前愆反規避退兵殊屬不合卽應嚴察議處但見在統

兵進剿俟大兵旋日察議又近日陝西大將軍圖海奏稱四川逆賊出寶雞立營則興安之地已空噶爾漢其統兵而前擊破賊寇恢復興安諸處毋失機宜○以崔維雅爲湖北布政使由江南按察使遷○癸未以庫爾喀爲山西按察使原任陝西按察使○甲申先是馬承廕郭義等尙未投誠上命簡親王喇布及將軍穆占等撥每佐領兵或三人或四人遣一副都統率往桂林至是喇布奏稱分兵發往桂林鎮守永州則臣等所部進剿之兵力殊單弱上諭今馬承廕郭義等俱已投誠則平南王及莽依圖等兵皆可達桂林簡親王等不必分兵發往仍與安親王約剿殺賊寇○以趙璟爲工部右侍郎由通政使遷○戊子先是提督趙良棟奏湖南已經平定應復漢中興安臣願獨當一路竭忠自效上命大將軍圖海等確議至是圖海等奏棧道益門鎮各口逆賊率眾來犯據險爲營今

令提督趙良棟進臨武寨相機而行俟臣等擊破益門鎮諸處賊
壘如有進取之機酌量分道而行 上諭湖南逆賊大敗困蹙遁
走大將軍安親王簡親王等三路進發平定武岡新甯諸處剿殺
賊寇貝勒察尼等進取辰州順承郡王及將軍噶爾漢等亦從鄖
陽彝陵規定蜀賊又馬承廕郭義等並皆薙髮廣西盡平平南王
將軍莽依圖等亦統兵進剿今逆賊震懾正當剿撫並用之時大
將軍圖海與將軍總督提督等共議亟殲侵犯寶雞之賊恢復漢
興以平蜀地○以舒淑布爲陝西布政使

由甘肅按察使遷